

Deklaratë Politike e Këshillit Drejtues të Partisë Demokratike të Kosovës

Prishtinë, 4 qershor 2025

Në mbledhjen e sotme të Këshillit Drejtues të Partisë Demokratike të Kosovës u diskutua dhe u miratua kjo deklaratë politike që pasqyron qëndrimin zyrtar të PDK-së lidhur me zhvillimet më të fundit politike dhe shtetërore në vend. Partia Demokratike e Kosovës riafirmon identitetin dhe misionin e saj si forcë shtetformuese dhe shtetndërtuese, që me përkushtim të lartë institucional dhe kombëtar vepron gjithmonë në shërbim të interesit publik dhe qytetarëve të Republikës së Kosovës, sidomos në momentet më sfiduese për vendin, si ky që po kalojmë aktualisht.

Partia Demokratike e Kosovës mbetet e përkushtuar të jetë:

- Faktor stabiliteti shtetëror,
- Bartëse e një vizioni për të ardhmen, dhe
- Zë i fuqishëm i çdo qytetari që kërkon zhvillim, dinjitet dhe një shtet me prosperitet.

1. Vlerësimi për zgjedhjet e 9 shkurtit

PDK shpreh mirënjohje të thellë për qytetarët e Kosovës për besimin e madh dhe mbështetjen e fuqishme në zgjedhjet e përgjithshme të 9 shkurtit. Njëkohësisht, falënderon me respekt të jashtëzakonshëm çdo aktivist, strukturë, zyrtar, kandidat/e për deputet/e dhe kandidatin për Kryeministër, Bedri Hamza, për angazhimin dhe përkushtimin e treguar. Rezultati i arritur, rreth 200 mijë vota, përfaqëson një rritje të ndjeshme elektorale. Ky besim i fuqishëm nga qytetarët është dëshmi e qartë se jemi në rrugën e duhur të rritjes dhe fuqizimit politik, dhe na obligon të ecim përpara me vendosmëri, përkushtim dhe përgjegjësi drejt misionit tonë për të ndërtuar një shtet të zhvilluar, demokratik dhe të drejtë. PDK ka qenë, është dhe po punon që të mbetet forcë kryesore politike në vend, me energji të reja dhe një vizion të qartë për të ardhmen.

2. Situata aktuale politike dhe bllokada institucionale

Fatkeqësisht, fitorja e demokracisë që qytetarët e Kosovës e realizuan më 9 shkurt, po zhbëhet në mbi 100 ditët pasuese nga bllokada e qëllimshme dhe mungesa e plotë e përgjegjësisë politike nga koalicioni që doli e para në zgjedhje. PDK shpreh shqetësimin e thellë për situatën aktuale dhe vonesat e pajustificueshme në themelimin e institucioneve. Kjo bllokadë institucionale ka krijuar pasiguri politike, sociale dhe po dëmton rëndë interesin qytetar e shtetëror. Si parti

shtetformuese, PDK edhe këtë herë ka vepruar në mënyrë konstruktive dhe të përgjegjshme për t'i kontribuar zhbllokimit të kësaj situate, përmes hapave konkretë si:

- Propozimit për ndryshimin e kandidatit për Kryetar të Kuvendit,
- Takime me të gjithë akterët relevantë, në funksion të konstituimit të Kuvendit,
- Propozimit për thirrjen e një takimi konsultativ nga Presidentja e Republikës me partitë kryesore shqiptare, takim që u mbajt më 15 maj, në funksion të konstituimit të Kuvendit.

PDK bën thirrje edhe një herë për reflektim të menjëhershëm dhe për përmbushje të përgjegjësiwe institucionale, veçanërisht ndaj koalicionit që ka dalë e para. Është urgjent konstituimi i Kuvendit dhe kalimi në afatet kushtetuese për formimin e Qeverisë së re.

3. Qeveria e re dhe prioritetet shtetërore

Në këtë moment të rëndësishëm për vendin, PDK thekson nevojën urgjente për një qeveri funksionale, që ofron zgjidhje reale për sfidat që po kalojnë qytetarët dhe shteti i Kosovës – posaçërisht me sektorin e energjisë. PDK, duke e llogaritur partinë që doli e para në zgjedhje si përgjegjëse për keq-qeverisje dhe stagnim shtetëror, rithekson përsëri se zgjidhja më optimale në këtë periudhë do të ishte formimi i një qeverie nga partitë që deri më 9 shkurt ishin në opozitë, një qeveri me përgjegjësi, profesionalizëm, vullnet për bashkëpunim dhe ide të qarta. Kjo Qeveri, ndër të tjera, do të realizonte një agjendë qeverisëse emergjente me prioritet:

- Rimëkëmbjen ekonomike dhe përmirësimin e mirëqenies së qytetarëve,
- Forcimin e sigurisë, mbrojtjes dhe zhvillimit të infrastrukturës,
- Bashkëpunimin e ngushtë me aleatët strategjikë, heqjen e masave ndëshkuese dhe integrimin euroatlantik të vendit.

4. Përgatitjet për Zgjedhjet Lokale

Si fituese e Zgjedhjeve Lokale të vitit 2021, Partia Demokratike e Kosovës hyn në ciklin e ri zgjedhor me synimin për të ruajtur dhe rritur më tej rezultatin e saj zgjedhor në nivel komunal. Me këtë qëllim, Këshilli Drejtues i Partisë Demokratike të Kosovës mandaton menjëherë Kryetarin dhe Kryesinë e partisë që të ndërmarrë të gjithë hapat e nevojshëm për përgatitjen e strukturave organizative për Zgjedhjet Lokale.

PDK do të angazhohet për të identifikuar dhe përzgjedhur kandidatët më të përgatitur dhe më përfaqësues për kryetarë komunash, në përputhje të plotë me kriteret partiake, ligjore dhe kushtetuese. Këta kandidatë do të jenë bartës të vizionit tonë për zhvillim lokal, qeverisje të mirë dhe shërbim cilësor ndaj qytetarëve, vlera të cilat janë dëshmuar gjatë katër viteve të fundit.

Objektivat strategjikë të PDK-së në këtë proces janë:

- Rikonfirmimi i besimit në komunat që aktualisht qeverisen nga PDK,
- Fitorja në komuna të tjera, përmes një oferte dhe vizioni të ri politik.

5. Zhvillimet në Dhomat e Specializuara në Hagë

PDK shpreh shqetësimin e thellë për vendimin e fundit të Dhomave të Specializuara në Hagë, të cilat refuzuan kërkesën për mbrojtje në liri të Kadri Veselit, Jakup Krasniqit dhe Rexhep Selimit, pavarësisht se Prokuroria e ka përfunduar paraqitjen e provave dhe dëshmitarëve që në prill. Ky vendim përbën një shkelje të hapur të të drejtave themelore të njeriut, të garantuara nga Kushtetuta e Kosovës dhe Konventa Evropiane për të Drejtat e Njeriut.

Mbajtja e tyre, bashkë me ish-Presidentin Hashim Thaçi, në paraburgim, për më shumë se katër vjet e gjysmë, pa një vendim përfundimtar, jo vetëm që bie ndesh me parimet themelore të së drejtës, por përbën një trajtim të padrejtë dhe arbitrar, që nuk do të duhej të tolerohej në asnjë gjykatë me standarde demokratike. Kjo praktikë jo vetëm që cenon dinjitetin dhe të drejtat individuale të të akuzuarve, por minon besimin në drejtësinë ndërkombëtare dhe ngrit pyetje serioze mbi motivet dhe qasjen e këtij institucioni.

Në këtë fazë të procesit, mbrojtja në liri nuk duhet të shihet si privilegj, por si e drejtë themelore. PDK u bën thirrje Dhomave të Specializuara që të rishikojnë qasjen e tyre dhe të veprojnë në përputhje me legjislacionin e Kosovës, të drejtën ndërkombëtare, me parimet e drejtësisë dhe të barazisë, dhe të mos udhëhiqen nga perceptimet politike apo paragjykimet historike.

Këshilli Drejtues

Partia Demokratike e Kosovës

Prishtinë, 4 qershor 2025